

RIGENSIUM MUSARUM .

Fautores benevolentissimos,
Amatores flagrantissimos,
Cultores diligentissimos,

ut

DE REGIÆ CIVITATIS RIGÆ LAUDIBUS,

Juvenem

*Modestia morum & literarum culturâ
Politissimum,*

Politissimum,

DANIELEM TITZMANNUM,

RIGENSEM,

Ad d. XII. Februarii, horamq; X.

In Athenai nostri Acroäterin,

Perorantem haud graventur audire,

Demissè & humanissimè

invitat

M. HENNINGUS WITTE,


Eloq. & Histor. Prof. P.

Ex Typographico HENRICI BESSEMESSERI.

P L A T O.

Patria amat, & vult ipsa amari:
Tuetur suos, nec vult negligi:
Paria à civibus exigit officia:
Quod cuiq; nostrum præstat, jure suō repetit

Est. A





Citè admodum & ex veritatis tripode, Politicorum Smaragdus, Corn. Tacitus; Dum vetera extollimus, recentium incuriosi. Pariter Plinius ætatis suæ suggillans incuriam; Postquam, inquit, laudanda facere desimus, laudari quoq; ineptum putamus. Commune etenim hoc est malum hodie & latè serpens, quod omnes propè Civitates, tanquam pestilens sidus, afflavit. Præsentia invidiâ, præterita veneratione prosequimur: Illis nos obrui, his instrui credimus, ceu nimis rectè Vellejus sentit Paternulus. Succinit ei suavissimè Lyricorum dux & lux Horatius: Virtutem incoluimem odimus, sublatam ex oculis quærimus invidi. Quocirca Fabius, vel quisquis Dialogi de Oratoribus auctor, vitio malignitatis humanæ assignat, vetera semper in laude, præsentia in fastidio esse. Ex quo luculententer apparet, quām graviter hallucinentur, qui antiqua tantùm efferre, recentiorū autem studia irridere atq; contemnere solent. Melius dubio procul & limatiori cum judicio noster iterum Plinius: Sum ex iis, qui miror antiquos, non tamen temporum nostrorum ingenia despicio. Neq; enim tam lassa & quasi effæta est natura, ut nihil jam laudabile pariat: Nec omnia apud priores meliora, sed nostra quoq; ætas multa laudis & artium studia posteris imitanda tulit. Unde verò sit, quod, sicuti vino veteri; sic & pristinis scriptoribus omnium penè populorum consensus plus existimationis tribuat, novos

contrà fastidiosa aut respuant secula, aut infra meritum deterant? Id altioris paulò esse indaginis videtur. Nobis si quidem omnibus, ex Poëtæ cujusdam mente, insitum est, ut rarò ingenio cedere velimus, ac laudem exinde affectemus. Hanc si ab alio præripi putemus, palmam ejus adhuc nascentem ut plurimùm conamur infringere. Accedit, quod veteres, tanquam in partam gloriæ hereditatem, & longâ seculorum serie corroboratam, venerint, de cuius gradu à novis licet ingeniosissimis dejici nullò modô possunt. Verùm enim verò minimè nos adeò fama, senioris ævi miratrix, fascinare debet, ut quascunq; gentis nostræ lucubrations & præclara inventa præpostorè repudiemus. Multi sanè, ne cuiquam suorum coætaneorum quicquam tribuant, quô suam atteri gloriam credunt, ad priscæ ætatis homines transferunt univerſa. Quin imo tanta non nullos vexat vescania, ut antiquorum exoletas etiam sordes pro oblectamento habere malint, quām dignum suo ævo cultum deferre. Largimur equidem phrasin aliquam haud judicari Latinam, quod Mureti, quod Heinsij, quod Manutij ea sit; sed quod Tullij, quod Cæsaris, quod Sallustij: Nec tamen, velut barbara, repudiemus, cùm isti ex his aliisq; veterum eam omnino habeant. Plurimùm utiq; hīc dextra valet imitandi solertia. Quoties, quæſo, magistrum suum prævertit discipulus? Solutâ vicit oratione Demosthenem Cicero, ligatâ Homerum Virgilius. Nam pleriq; qui imitantur alium, omissis in illo, quæ trita apparent, lumina ferè verborum phrasiumq; & quicquid præ aliis elegantiâ aliquâ ferit animos, annotant, convertunt, atq;

atq; ex his, veluti flosculis, maximam partem sua conficiunt. Experientia insuper minimè fallax docet, quod facilius & majori cum voluptate scriptorem legimus, nostris moribus & temporibus accommodatum, quām obsoleturn, & ignotarum rerum argumento reconditum. Certè qui intra veterum lectionem unicè consistunt, recentiorum incuriosi, non possunt non in alienis, Romanorum scilicet aut Græcorum, actionibus, quæ parum ad nos, oculati esse, sed ut in sui ævi rebus cæci maneant, peregrè domestici domiq; peregrini. Priscos quippe non aliò fine evolvimus, quām ut ad nostri temporis usum eos transferamus. Id quod autem abundè Neoterici præstiterunt, ut hac proinde operâ supersedere nobis facilè liceret. Hinc consultius meō quidem ageret judiciō, si quis in nostra aliquando versari Rep. insigni cum fructu cuperet, ut hujus & superioris seculi historiam Suecorum Polonorumq; exactè addisceret, quām si totum Herodotum, totum Polybiū, aliosq; ex antiquis ad unguem recitare valeret. At verborum ut faciamus compendium: Latinæ æquè ac Græcæ linguæ elegantiam è fontibus veterum hauriendam esse mecum fatebitur, qui sine odio ac livore judicabit. Cùm autem meritò potior sit habenda rerum ratio, quæ uberior multū in recentiorum invenitur monumentis, quorum aliqui eā in re antiquis anteferri possunt: Ideoq; ita nostram dispertiamus industriam, ut utrosq; maximā simul curā lectitemus. Caveant tamen sibi quām diligentissimè Studiosi juvenes, ne, juxta Quintiliani monitum, recentis hujus lasciviæ flosculis capti pravâ voluptate deliniantur.

Ingratus enim omnino essem in optimos antiquitatis magistros, si illos è manibus literis incumbentium promiscue excutere vellem. Conjugendos potius hos sapientiae inventores statuo cum eximiis nostratum scriptis. Sed quò præter intentionem dilapsus sum? Hoc tantum innuere volui, non laude minus digna hodiendum fieri, ac olim; nec nostrâ penitus ætate desissem, quod omni celebrare encomio convenit. Ista probè secum expendens Ornatissimus juvenis, Declamator noster, nec Romulum, nec Cyrum, nec Latium, nec Carthaginem, aut aliud quid ex ima vetustate petitum, pro prima ingenij laude, dilaudare voluit. Patriam elegit dulcissimam, RIGAM, altricem ac nutricem suam benignissimam, cuius elogium scribere, ac in publica panegyri recitare, toto flagravit animo. Nihil enim antiquius, nihil suavius, nihil sanctius habere solemus, quam illos parietes, in quibus orti & procreati sumus, quam illas cunas & cubicula, quæ prima fuere vitæ nostræ hospitia. Quis itaq; vitio ei vetteret, si, horum amore irretitus, locum, in quo vitalem auram hausit, primaq; posuit pietatis & artium bonarum fundamina, summo exornare præconiô allaboraret? Quum Epaminondas, Thebanorum Dux, viciis profligatisq; Lacedæmoniis triumpharet, sciscitanti cuidam; quid in vita maximè jucundum ei accidisset? respondit: Nihil illâ victoriâ, quam & carissimam Patriam, & vivos Parentes, gloriæ meæ spectatores, in libertatem pristinam vindicavi. Tanti ergo jure meritoq; eam fecit terram, quæ ipsum, hac luce donavit. Nec est ulla regio tam horrida, inculta,

ta, inamæna & barbara, quæ alumno suo talis, nec potius culta, civilis, amæna & jucunda videatur. Non dicam, quod amor & desiderium natalis soli in animantibus quoq; appareat, quæ cupidius ibi verlantur, & libenter eò recurrunt, ubi primùm procreatæ & educatæ sunt. Mirum est, quod Livius, historiæ Latinæ princeps, alicubi de L. Junio Bruto, primo Romanorum Consule, refert. Hic, ob patriæ amore, Titum & Tiberium filios, conspiratione cum Vitelliis initâ, Tarquinios ejectos reducere studentes, virgis cædi ac securi percuti non solùm jussit, sed etiam vultu nihil mutatô vidit. Quamobrem de pietate in Patriam præclarè locutus disertissimus Romuli nepotum. Chari sunt, ait, Parentes, chari liberi, propinqui, familiares; sed omnes omnium charitates Patria una complexa est. Pro qua quis bonus dubitet mortem oppetere, si ei sit profuturus? Unde est, quod Imperatores in prælio exhortari milites ad fortius pugnandum non potuerint, quam si dixerint: Pro patria, pro aris & focis dimicandum est. Quid? quod jam dudum in Proverbium abierit: Patriæ fumus igne alieno luculentior. Ejus verò ornamentum & decus maximum orthodoxa audit Religio, veriq; DEI cultus nullis portentosis hominum commentis fœdè maculatus; sed cum norma Sanctissimorum Oraculorum per omnia congruens. Hoc cujusvis Reip. præcipuum est *επιμήλιον*, quod ut à Majoribus per manus accepimus, sic nobilissimi instar patrimonij, solicite custodiendum, & posteritati, si quæ erit, inviolatè conservandum

dum est. Dehinc Patriam mirum quantum exornant,
qui DEI vices in ea gerunt, ac Magistratum legitimè sub-
eunt. Insigne extra dubium alicujus urbis donum ac bo-
num, si ibi in rebus turbulentis & dubiis matura Proce-
rum adhibeat sapientia, non aliter atq; in sœva tempe-
state validus clavus, plurimæ fulturæ, & providus in pri-
mis gubernator. Postremò si ea etiam adsint, sine qui-
bus vita hæc mortalium traduci commodè nequeat. Ta-
lia sunt, quæ in rei familiaris administratione necessariò
requiruntur. Huc igitur conjugium, ne libidini freno-
laxentur, huc justa sobolis educatio, ne à præceptis DEI
& naturæ discedat, huc aurea illa in vietu & amictu perti-
net mediocritas, ne à luxu & immodicis profusionibus
rei consumantur publicæ vires, aliaq; quorum mentionem
facere præsentis non capit paginæ angustia. Nihil nunc
restat, quām ut denuò ad TITZMANNUM meum ser-
mone revertar, Vos LITERATORUM MAECENA-
TES ET LITERARUM AMANTES, ejus causâ ro-
gitans, ut proximâ die Jovis, in Musarum nostrarum do-
micio, dicturo aures præbere ne dedignemini. Si, quod
opto voveoq;, novus iste Vobis placuerit Orator, optent
ei omnes mecum, ut aliquando bonus evadat nulli conce-
dens Patriæ civis, aut etiam, si DEUS voluerit, ejus lu-
men. Sed hæc cœlo & tempori committenda. Veni-
te modò frequentes, &, prout merebitur, secundâ eun-
dem admurmuratione cohonestate. Dabam Rigæ d. IIIX.
Febr. Anno O. R. cl̄ Ic LXXX.